



Broj: 01,02,03,04/3-05-2-587/25

Sarajevo, 31. 7. 2025.

BOSNA I HERCEGOVINA
PARLAMENTARNA SKUPŠTINA BOSNE I HERCEGOVINE
SARAJEVO

PRIMLJENO: 05-08-2025			
Organizaciona jedinica	Klasifikaciona oznaka	Redni broj	Broj priloga

B

IZVJEŠTAJ

s 32. godišnjeg zasjedanja Parlamentarne skupštine OSCE-a Porto, Republika Portugal, 29. 6 – 3. 7. 2025.

Prvi zamjenik predsjedavajućeg Delegacije Parlamentarne skupštine BiH u Parlamentarnoj skupštini Organizacije za sigurnost i saradnju u Evropi Albin Muslić učestvovao je na 32. godišnjem zasjedanju PSOSCE-a u Portu, Republika Portugal od 29. juna do 3. jula 2025, a koje je održano o temi: "Obilježavanje 50 godina Helsinškog završnog akta: Odgovor na novu stvarnost u OSCE-u".

Godišnje zasjedanje Parlamentarne skupštine OSCE-a glavni je statutarni sastanak Organizacije te je ovo, 32. po redu, okupilo preko 200 parlamentaraca iz zemalja regije OSCE-a. U okviru zasjedanja održane su sjednice Stalnog i generalnih komiteta te one plenarne same Skupštine.

Prvi dan godišnjeg zasjedanja otvoren je sjednicom Stalnog komiteta, a koja je po ustaljenoj proceduri počela usvajanjem liste učesnika, kako na plenarnoj, tako i na sjednicama generalnih komiteta te rasporedom predloženih dodatnih tačaka po komitetima. U okviru te tačke, Prijedlog rezolucije o jačanju pozitivnog programa saradnje na Zapadnom Balkanu, glavnog predlagača potpredsjednika i posebnog izaslanika PSOSCE-a za Jugoistočnu Evropu Kyriakosa Hadjiyiannija, proslijeđen je na plenarni dio zasjedanja. Potom je aktivno diskutirano o izvještajima predsjednice, šefa finansija i generalnog sekretara PSOSCE-a te je odobren revidirani Prijedlog budžeta PSOSCE-a za 2025. i 2026. godinu.

Plenarni dio ovogodišnjeg zasjedanja svojim obraćanjima otvorili su: predsjednica PSOSCE-a Pia Kauma i predsjedavajuća portugalske Delegacije Paula Cardoso zajedno s predsjednikom Parlamenta Portugala Joseom Pedrom Aguiar-Brancom.

Prema prethodno utvrđenoj raspodjeli, prvog dana plenarne sjednice razmatrani su prijedlozi rezolucija o: Pedesetoj godišnjici Helsinškog završnog akta: Globalni izazovi za mir i sigurnost u regiji OSCE-a, glavnog predlagača Poturajeva iz Ukrajine; Helsinškom procesu nakon 50 godina, glavne predlagateljice Kaume iz Finske i o jačanju pozitivnog programa saradnje na Zapadnom Balkanu, glavnog predlagača Hadjiyiannija s Kipra. U okviru diskusije o navedenom prijedlogu, obratio se i zamjenik predsjedavajućeg Delegacije PSBiH Albin Muslić kao jedan od supotpisnika Prijedloga rezolucije. Poslanik Muslić je naglasio

kako su saradnja i mir na Zapadnom Balkanu prioritet u ovim izazovnim vremenima te istaknuo važnost Rezolucije za Bosnu i Hercegovinu, ali i regiju u cjelini. Nezavisnost pravosuđa i borba protiv korupcije kroz zakonske izmjene te prekogranična saradnja od vitalnog su značaja za našu državu, rekao je Muslić i dodao kako su vladavina prava te jednakost primjene za sve temelj svakog demokratskog društva i jedan od ključnih prioriteta za Bosnu i Hercegovinu. Po završetku prvog dana, usvojen je Prijedlog rezolucije o jačanju pozitivnog programa saradnje na Zapadnom Balkanu i kao takav je pronašao svoje mjesto u Deklaraciji ovogodišnjeg zasjedanja, završnog dokumenta događaja. Kroz spomenutu Rezoluciju se prepoznaje strateški značaj Zapadnog Balkana za stabilnost, sigurnost i mir u Evropi te regiji OSCE-a, izražava zabrinutost zbog aktuelne političke nestabilnosti u regiji te podvlači da su pomirenje, inkluzivna regionalna saradnja i dobrosusjedski odnosi ključni za međusobno povjerenje i zajednički napredak.

Ostali dani zasjedanja protekli su uz nastavke sjednica Generalnog komiteta za politička pitanja i sigurnost, Generalnog komiteta za ekonomska pitanja, nauku, tehnologiju i okoliš, čiji je član poslanik Muslić, te Generalnog komiteta za demokratiju, ljudska prava i humanitarna pitanja, a čiji su dnevni redovi utvrđeni poslovníkom i prethodnom raspodjelom dodatnih tačaka, što uključuje utvrđivanje i razmatranje izvještaja sva tri komiteta, prijedloge rezolucija te izbore rukovodstava.

Generalnom komitetu za ekonomska pitanja, nauku, tehnologiju i okoliš dodijeljene su dodatne tačke o: odgovoru na demografsku zimu; perspektivi mladih osoba u regiji OSCE-a, zajedničkim nazivnicima problema korupcije, organiziranog kriminala i terorizma; o promociji iskoristivosti zaplijenjene imovine stečene organiziranim kriminalom; problematici i povezanosti klimatskih promjena, korupcije i sigurnosti u regiji OSCE-a te jačanju parlamentarne diplomatije i brige o budućim generacijama, a koje su uz amandmansko djelovanje parlamentaraca i usvojene.

Razmatran je i izvještaj Komiteta koji je kroz diskusiju i usvojenih devet amandmana dobio opću podršku članstva. Parlamentarci su se u konačnici saglasili o tome da se u Izvještaju razrađuju teme migracija, klimatskih promjena, ali i one energetske te vještačke inteligencije.

Posljednjeg dana zasjedanja komiteta, održani su i izbori za rukovodstvo Generalnog komiteta za ekonomska pitanja, nauku, tehnologiju i okoliš te su obnovljeni mandati predsjedavajućeg Azaya Guliyeva (Azerbejdžan), zamjenika predsjedavajućeg Artura Gerasymova (Ukrajina) i izjvestiteljice Paula Cardoso (Portugal).

Na dnevnom redu posljednjeg dana plenarne sjednice bilo je razmatranje dodatnih tačaka i obraćanje dva predsjednička kandidata Perea Joana Ponsa iz Španije i Marka Pritcharda iz Ujedinjenog Kraljevstva. Najšira diskusija vodila se o Prijedlogu rezolucije šefa finansija Busera kojim su uvećana dosadašnja izdvajanja država kako bi se kompenzirao izostanak Ruske Federacije u tom pogledu, a koja je naposljetku usvojena.

Uz najširu podršku parlamentaraca usvojena je i Deklaracija ovogodišnjeg zasjedanja. Njome se, uključujući i prethodne godišnje deklaracije PSOSCE-a, osuđuje agresiju Ruske Federacije na Ukrajinu te jasno izražava, sada već, nastavak podrške Ukrajini, ali i osuda humanitarne krize koja se ogleda i u prisilnim deportacijama. Njome se snažno podržavaju diplomatski naponi SAD-a s ciljem okončanja rata te zagovara prepoznavanje i procesuiranje

ratnih zločina. Također, poziva se i zemlje članice OSCE-a da doprinesu u punoj mjeri rekonstrukciji Ukrajine u cestovnom, ekonomskom i svakom drugom pogledu. Ponovo je iskazana podrška pravu na postojanje i odbranu Izraela, ali i istaknuta obaveza poštivanja Povelje UN-a te međunarodnog, humanitarnog i ljudskih prava svih aktera na Bliskom istoku uz zahtjev za trenutnim prestankom sukoba i odbacivanjem bilo kakvih teritorijalnih ili demografskih promjena, kako u Pojasu Gaze, tako i na Zapadnoj obali. Primljeni su k znanju izdati nalozi za hapšenje aktera sukoba i podcrtan imperativ osiguravanja potpune odgovornosti za sve počinjene ratne zločine.

Kroz ponovljeno pozivanje na principe Helsinškog završnog akta iskazana je potreba za usvajanjem ambicioznih klimatskih akcionih planova, stavljen naglasak na naučna istraživanja, smanjenje štetnih emisija, otvaranje kvalitetnih radnih mjesta te održivog ekonomskog rasta, zaštite izvora pitke vode kao i racionalizacije i reguliranje eksploatacije rijetkih zemnih elemenata. Također, istaknute su teme vještačke inteligencije i moguće uspostavljanje ad hoc komiteta u okviru PSOSCE-a, kao i proporcionalnije spolne zastupljenosti zvaničnika Organizacije.

U Deklaraciji je, kroz usvajanje na plenarnom dijelu zasjedanja i generalnim komitetima, svoje mjesto pronašla i 21 rezolucija koju su predložili parlamentarci. Osim usvojene Rezolucije o jačanju pozitivnog programa saradnje na Zapadnom Balkanu, u fokus PSOSCE-a stavljen je različit spektar tema, sve od 50. godišnjice Završnog akta u Helsinkiju, mira i stabilnosti na Bliskom istoku te poštivanja međunarodnog prava, prevencije radikalizacije mladih preko osnaživanja parlamentarne diplomatije, međunarodnih misija PSOSCE-a za posmatranje izbora, podrške Moldaviji i demokratskim vrijednostima u Gruziji sve do prevencije krijumčarenja djece te borbe protiv ruskih dezinformacija i pokušaja prekrajanja historijskih događaja.

Kao posljednja stavka ovogodišnjeg zasjedanja održani su izbori za rukovodstvo PSOSCE-a na kojima je Pere Joan Pons izabran za predsjednika u dvogodišnjem mandatu, a uz njega su izabrani i potpredsjednici: Zoffili iz Italije, Potučkova iz Češke, Hajdu iz Rumunije i Charalambides s Kipra te je Buser iz Švicarske ponovo izabran za šefa finansija.

Zamjenik predsjedavajućeg Delegacije PSBiH Albin Muslić održao je sastanak s novim predsjednikom PSOSCE-a Pereom Joanom Pansom. Muslić je naglasio važnost Jugoistočne Evrope u trenutnim geopolitičkim okolnostima te se posebno osvrnuo na političku situaciju u Bosni i Hercegovini. Sagovornici su podvukli potrebu za relaksacijom političkih tenzija u zemlji i nastavkom evropskog puta Bosne i Hercegovine te angažmanom Misije OSCE-a kao najviših prioriteta. Ključan je nastavak i još aktivnija saradnja s PSOSCE-om koju će donijeti novo rukovodstvo Organizacije, zaključili su Muslić i Pons. Posebno su se dotaknuli sukoba u regiji Organizacije u svijetu, a čemu će, kako je rekao predsjednik Pons, PSOSCE-a u predstojećem periodu posvetiti značajniju pažnju. U završnici je diskutirano o reprezentativnosti mladih parlamentaraca u okviru PSOSCE-a i na vodećim pozicijama, te problematici finansiranja cijele Organizacije, a što će, kako je kazano, zauzeti posebno mjesto i u dvogodišnjem akcionom planu predsjednika Ponsa.

Pripremio:

Sekretar Delegacije
PSBiH u PSOSCE-a

Teo Rogić



Odobrio:

Prvi zamjenik predsjedavajućeg
Delegacije PSBiH u PSOSCE-a

Albin Muslić



Dostaviti:

- Kolegiju Doma naroda Parlamentarne skupštine BiH
- Kolegiju Predstavničkog doma Parlamentarne skupštine BiH
- Kolegiju sekretarijata Parlamentarne skupštine BiH
- članovima Delegacije PSBiH u PSOSCE-a
- Komisiji za vanjske poslove Predstavničkog doma
- Komisiji za vanjsku i trgovinsku politiku, carine, saobraćaj i komunikacije Doma naroda
- Sektoru za odnose s javnošću
- a/a